

Segun AVP:

WATTY VOS TA DUNA LES DI POLITICA



Ministro Watty Vos

ORANJESTAD (AAN): Ta pakico Watty Vos semper ta midi su palabranan asina bon? Pakico Watty Vos mas cu tur

otro politico na Aruba y Antiyas sa ki ora e bisa kico y con? Ta pakico no ta gara Watty Vos riba su palabranan? Ta pakico Watty Vos tin tanto aña den politica y apesar di tur critica ta sigui cu un admiracion grandi di amigo y no-amigo?

Segun AVP, ayera Watty Vos a muestra pakico. Den e conferencia di prensa di partido AVP pa trata e 'pamfleta' di MEP riba 'zakenkabinet', Watty Vos a demostra tur esaki. Cu su expresionnan tradicionalmente skerpi y hopi biaha gracioso, Watty no solamente a muestra di coñ e posicion y argumentacion di un 'zakenkabinet' di MEP ta inacceptable, pero el a muestra su habilidad politico un biaha mas. Un di e expresionnan cu mas a hala atencion personal tabata ora

Watty a muestra cu politiconan sa lubida kico nan ta bisa y e consecuencia di esaki. Watty a cita e expresion ingles cu ta bisa "Politiconan mester uza palabranan dushi y suave, en caso cu nan mester guli nan despues".

Watty a manda di e forma aki un mensahe masha cla pa tur politico veterano y nobato. Y tur hende ta di acuerdo cu e tin razon completo. Ehempelnan tin na cantidad di politiconan cu ta papia un cos awe y mayan ta haci lo contrario. Di acusacionnan pisa cu nan ta haci den direccion di otro hende, pa despues resulta cu nan ta mescos of pio. Tuma e ehempel di Nelson Oduber dia cu el a declara cu "mundo no ta cuminsa na Den Haag y caba na Washington" ora el a critica Hu-

landa y Merca pa nan presunto metemento den asuntonan di Aruba. Algun luna despues e mes un Nelson Oduber a bay Hulanda y bolbe cu su rabo mei mei di su pia y mas despues a gaba cu el a worde ricibi na Washington pa funcionarionan Mericano halto.

Segun AVP, tuma por ehempel e bromamento di ex-minister di husticia Hendrik Croes cu tabata gaba su ley y maneho di combatiendo di trafico di droga y di acetona via Aruba, mientras cu na e mes un momento el a laga un barco yen di acetona sali for di waf di Playa cu rumbo desconoci.

Tuma por ehempel e critica constante di e lider sindical Gregorio Wolf riba gobierno cu e lo ta 'narco-complaciente' y cu e

tin prueba di esaki, pero ora polis a pidi y despues exige pa papia, el a keda keto-keto. Otro ehempel ta e acusacionnan di dos miembro di parlamento hoben di MEP cu miembronan di AVP lo ta den corrupcion, pa despues bin sali na cla cu un a comete acto di corrupcion durante di su estudio y e otro mientras e ta den un funcion importante den enseñanza.

E BALOR DI EXPERIENCIA: Loke Watty Vos a demostra ayera ta e balor di experiencia di bida y den politica. El a duna tur hende un les di bida y di politica, cu si nan ta sabi, ta haci bon uso di dje. Ta for di e experiencia amplio di un hombre manera Watty cu Bo ta siña relativa tur cos cu socede of worde bisa. Ta for di e experiencia aki Bo por pone tur cos den un contexto mas amplio y compara pasado y presente. Ta pa e motibo aki cu un hende manera Watty Vos, apesar di su edad, ta progresivo compara cu politiconan hopi mas hoben pero cu ya a pega den politica bieu di esanan cu nan a scoge pa sigui.

Watty ta demostra cu no ta 'edad den cantidad di aña, pero e hubentud di Bo espirito' ta loke ta conta den bida y den politica. E argumento di MEP cu mester crea confianza entre e dos partidonan, pero cu ta laga otro hende den un 'zakenkabinet' goberna, tambe a worde desbarata cu idioma di Pueblo door di Watty. El a muestra cu ta politiconan mes mester traha cu otro si mester crea confianza y no laga otronan haci esaki, mientras esnan cu awor falta confianza ta keda para un banda. E falta di argumento di MEP a keda demostra bon cla y henter e 'documento' cu MEP a purba presenta a keda nada mas cu un 'pamfleta' politico.

E motibo: argumentonan fofo, un idioma ofensivo, denigrante y arrogante, y condicionnan cu pa ningun hende of partido lo por ta aceptable.